

Inatsisartut suleriaasianni § 33 naapertorlugu aalajangiiffigisassatut siunnersuut manna Naalakkersuisunit saqqummiunneqarpoq:

Politiit sulinerat pillugu inatsisip allanngortinneqarnera pillugu inatsisit assigiinngitsut Kalaallit Nunaannut atuutilersinneqarneri pillugit peqqussut pillugu siunnersuut (Politiit timmisartunik inuttaqanngitsunik suujunnaarsitsisinnaanerat il.il. pillugit erseqqissaaneq) pillugu missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut (Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Tunngavilersuineq

Qallunaat naalakkersuisunit aamma Namminersorlutik Oqartussanit Kalaallit Nunaanni qallunaat akisussaaffigalugit suliaasaqarfiini ineriartortitsinermik suliaqarnermut ilaatillugu peqqussut suliarineqarpoq.

Ajornartoonernik pisoqartillugu sukkasuumik suliniuteqarsinnaanermut periarfissat pilersinniarlugit siunnersuut manna saqqummiunneqarpoq. Isumannaatsuunissaq eqqarsaatigalugu inatsisikkut politiit timmisartunik inuttaqanngitsunik aamma pequtunik allanik ungasianit aqunneqartunik suujunnaarsitsisinissaminut inatsisitigut killiliussanik erseqqinnerusunik peqalissapput.

Timmisartut inuttaqanngitsut pequtillu inuttaqanngitsut assingusut allat, qunusaarisutut nalilerneqartut, assersuutigalugu aallaasit, qassutit imaluunniit “timmisartoq inuttaqanngitsut saassussissut”-mik taaneqartartoq atorlugit, politiit pillugit inatsimmi § 5, imm. 1 malillugu politiit ullumikkut suujunnaarsissinnaareerpaat. Tamanna tamat toqqissisimatinneqarnissaasa akornusersorneqarnissaannut navianartorsiortitsineq kiisalu inuit ataasiakkaat aamma tamat isumannaatsuutinneqarnissaasa navianartorsiortinneqarnissaasa pitsaaliorneqarnissaannik politiit naliginnaasumik suliaasaqarnerannut atatillugu isiginiarneqassaaq.

Kisianni timmisartut inuttaqanngitsut immikkut ittumik politiit pillugit inatsimmi taaneqanngillat.

Tamat toqqissisimatinneqarnissaasa akornusersorneqarnissaannut navianartorsiortitsineq imaluunniit inuit ataasiakkaat imaluunniit tamat isumannaatsuutinneqarnissaasa navianartorsiortinneqarnissaat pitsaaliorniarlugit, timmisartunik inuttaqanngitsunik aamma pequtunik inuttaqanngitsunik allanik, imminnut nammineq aquttunik imaluunniit ungasianit aqunneqartunik, politiit suujunnaarsitsisinnaanernik periarfissamik malittarisassiuussisumik politiit pillugit inatsimmi inatsisitigut killiliussamik erseqqinnerusunik pissarsisoqarnissaa pisariaqartinneqartoq taamaalilluni nalilerneqarpoq. Timmisartunik inuttaqanngitsunik aamma pequtunik inuttaqanngitsunik allanik, imminnut nammineq aquttunik imaluunniit ungasianit aqunneqartunik suujunnaarsitsineq, pissutsit assigiinngitsut malillugit annertuumik akuliunnerusinnaanera eqqarsaatigalugu tamanna isiginiarneqassaaq, aamma tamanna

tunngavigalugu akuliunnerup atuuffissaanut piumasagaatit erseqqinnerusut aalajangersarneqarnissaat naleqquttuusoq nalilerneqarpoq.

Tamatuma saniatigut politiit pillugit inatsimmi siusinnerusukkut allanngortitsinerit, Kalaallit Nunaanni eqqunneqarsimanngitsut, kisianni Inatsiseqarnermut ministereqarfiup suliaasaqarfiani inatsisiliornerup nalinginnaasumik nutarterneqarneranut atatillugu Kalaallit Nunaannut naleqquttutut nalilerneqartut, eqqunneqarput. Taanna politiit cykeli pineqartoq tillinneqarsimasutut nalunaarutigineqarsimanersoq pillugu nakkutilliinissaq siunertaralugu, politiit cykelertunik unitsitsisinnaanermut piginnaatinneqarnissaannut tunngassuteqarpoq.

Missingiummut Naalakkersuisut oqaaseqaataat

Inunnut ataasiakkaanut aamma tamat isumannaatsuutinneqarnissaannut navianartorsiortitsinerit pitsaaliornissaannut aamma pillaatissiissutaasinnaasumik suliaqarnerup unitsinneqarnissaanut politiit pisariaqartinneqartunik periarfissaqarnissaasa qulakkeerneqarnissaa, Naalakkersuisut ilungersuutigaat. Tamanna tunngavigalugu politiit pillugit inatsimmi aalajangersakkat taakku erseqqissarneqarnissaannik politiit kissaateqarnerat, Naalakkersuisut isumaqatigaat.

Pisortanut aningaasaqarnikkut allaffissornikkullu kingunerisassat

Soqanngilaq.

Aningaasaqarnikkut allaffissornikkullu namminersorlutik inuussutissarsiutilinnut kingunerisassat

Soqanngilaq.

Innuttaasunut aningaasaqarnikkut allaffissornikkullu kingunerisassat

Soqanngilaq.

Tusarniaaneq

Inatsiseqarnermut ministereqarfiup tusarniaanermik ingerlatsineq piffissami 2026-imi 23. januarimiit 20. februarimut suliarisimavaa, tassanilu Kalaallit Nunaanni oqartussat attuumassuteqartut ilanngunneqarsimapput.

Ilanngussat

1. Politiit sulinerat pillugu inatsisip allanngortinneqarnera pillugu inatsisit assigiinngitsut Kalaallit Nunaannut atuutilersinneqarneri pillugit peqqussut pillugu siunnersuut (Politiit timmisartunik inuttaqanngitsunik suujunnaarsitsisinnaanerat il.il. pillugit erseqqissaaneq) pillugu missingiutip eqikkarneqarnera
2. Politiit sulinerat pillugu inatsisip allanngortinneqarnera pillugu inatsisit assigiinngitsut Kalaallit Nunaannut atuutilersinneqarneri pillugit peqqussut pillugu siunnersuut (Politiit timmisartunik inuttaqanngitsunik suujunnaarsitsisinnaanerat il.il. pillugit erseqqissaaneq) pillugu missingiut